

■ OR DA LA VITA DA LUDMILLA CAHENZLI

Alarm da bestias

«Nunpussaivel», di jau.

«Bain, quatter tocs!», di la gronda.

Jau ses en biro, tegn il corn dal telefon e spetg ch'jau vom en svaniment. Ma jau rest alerta.

«Vegns uss a chasa?», dumonda la gronda.

«Gea, jau vegn uschè svelto sco pussaivel», di jau.

Mia figlia pitschna haja plugs, ha la gronda gist ditg. Jau na poss anc adina betg crair. Plugs aveva la glicud en il temp dals cuvels, forsà anc en il temp medieval. Ma ozendi? En il 21avel tschientaner?

Jau met en il numer da telefon da mia mamma. Nagin na prenda giu. Daco è quella adina sin il sfratg, sch'ins dovra ella? Uschia stoss jau empruvar tut suletta da pensar cler. Ma quai che vegn endament n'è betg empernaivel. Probabel ha era la gronda plugs. Lezza di già dapi trais emnas ch'ella haja che mordia. Jau aveva ditg ad ella: «Quai vegn dal crescher.»

Dieu ma chastia cun uffants plain plugs. El ma strufegia, perquai ch'jau vom a lavurar, na stun betg a chasa e na lav betg mintga saira il chau a mes uffants, pens jau. Quest patratg dura però be duas secundas. Lura ma di jau: Ludmilla, chala cun quest pensar catolic, ti sas che Dieu è in prima tip. El ha gugent tuts e schizunt tai, la finala lavuras gea be a temp parzial.

Sinaquai cumenza anc l'emanza en mai ad argumentar: «Insumma. Dieu è bain ina dunna. E sco dunna ha ella segir chapientscha per talas situaziuns.»

E tgi sa tge cussegl ch'ina Dieua dess a Ludmilla?


«Va e cumpra schampo!»

«Grazia per il tip.»

«Dai! Fa zacu!»

En l'auto ma vegni endament ch'i fiss forsà clever da cumprar il schampo da plugs en il vitg vischinant. Sch'jau vom en nossa apoteca per schampo da plugs, sa suenter l'entir vitg ch'ils Cahenzlis han plugs. Quai na dovran ils auters betg savair. Jau tegn davant la drogaria dal vitg vischinant.

Il droghist fixescha immediat mia chavallera, cura ch'jau di ad el tge ch'jau less. La dunna sper mai va dus pass pli nenvi. Jau sent ch'ella ma taxescha.



ILLUSTRATURA YVONNE GIENAL/WWW.YVONNE-GIENAL.CH

Jau ves tuttenina mamezza tras ils egl da questa dunna: malpetgnada, mallavada – betg da smirvegliar che quella ha plugs.

En l'auto dovri intginas blastemmas, fin ch'jau hai scurlattà giu l'egliada penetranta da questa dunna.

Strusch ch'jau sun a chasa, svanescha la chasarina già dad isch ora. Ella pertgira ils uffants ed è adina stada svelta da bandunar il plaz da lavur, ma questa giada metta ella si in nov record. Jau vom per il «Naturführer» e guard suenter co ch'ils plugs vesan ora. Lura prend jau a mauns mes uffants e tschertg sin lur chaus in animal che vesa ora sco il plugl ch'è dissegnà en il «Naturführer». Betg schanza. Jau na chat nagut.

«Ma jau hai vesì quatter tocs sin il chau da la pitschna!», insista la gronda.

En il pac cun il schampo chattain nus in petgen, giain cun quel tras ils chavels da mintga uffant – e guarda qua, ils schanis cumparan.

L'interessant è ch'els na sa laschan betg smatgar ora be cun in det. Ins sto propi smatgar cun l'ungla per far star els. Ma laschaina talas brutalitads.

Eugen vegn a chasa. El chatta ch'i saja

legher ch'ils uffants han plugs. Fin ch'el va cun il petgen tras ses agens chavels ed i vegn nanavant ina da questas bestias.

L'entira famiglia sa renda en il bogn. Il rest stat atgnamain scrit sin il cedel d'instrucziun per l'adiever dal schampo: il chau vegn unschì en cun schampo. Lura èsi da spetgar tschintg minutas. Lura lavar or il schampo cun aua tievia. Lura repeter la procedura ina segunda giada. Lura stgarsinar or ils plugs futschs cun il petgen da plugs. Per la famiglia Cahenzli fa quai pia diesch giadas unscher en, diesch giadas lavar il chau e tschintg giadas stgarsinar. Suenter la segunda giada lavar il chau, hai mo pli aua freida. Ma gliez è in'otra story.

Ludmilla Cahenzli

PS: Bilantscha: Eugen aveva in plugl – quel da l'entschatta. Ludmilla trais. La gronda diesch. Il mesaun trais. La pitschna set – inclus quels che la chasarina e la gronda avevan già chattà suentermezdi.

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria